

# GENESIS

## SABTA 1

### 1:1-25 Gode inaminamino alukum klae bio be.

1-5 Sinanggwano mikiktemo Gode abilim esa dabal esa klae ta dabal basa keim bie ta be. Alukum ele uno uno olo mililano bio otane Gode hobe aalaang dim wat ei une be tle be bie ta Gode baane a Bomanal e! gene a bomanobio be. Gode bomanamino watene a e bobol ayam funanebio be. Gode baane a Bomanamino bo, genebio be. Gode bomanamin osa mililanamin osa afetanebio be. Eka Gode baane a Mililanamino bo, genebio be. Amo oloyem blimano ta

6-8 Gode baane a Ayung obo ewit uneb a aayo elaako nanok o! genebio be. Am asu blimano ta

9-10 Gode baane a Aaye abilimo kitem daak aaye kobo einal e! Eka dabal gatanek o! ge baabase be. E inane a klae bio be.

11-13 Gode baane a Inaminamino bukub osa as osa unalin osa alukum manal e! gene a manobio be. Dab sa biaano a dabo imin belanaso be. Am asu matna blimano ta

14-19 Gode baane a Afok osa alim esa awitnin osa tubunal e! ge baane a tubuso be. Gode baane a Afok obo tab dimo tubunal e! Eka alim esa awitnin osa kwinomo dimo tubunok o! inang ge baabonanebio be. Ele uno uno olo alukum ayal sena be. Amo asuke asuke o blimano

ta

20-23 Gode baane a Alukum aning a eka alukum inamin inamin olo aay tem ye nin e! e inang ge baane a inaibbio be. I alukum i memei yomaib ta walibbio be. Gode baane a Alukum wani ye nin e! e inang ge baane a inaibbio ta i alukum i memei yomaib ta walibbio be. Amo asuke asuke make nao blimano ta

24-25 Gode baane a Eil a kobol a noi a tim a inab a til a i alukum kim daak nin e! ge baabese be. Inaibbio be. I alukum i memei yomaib ta walibbio be.

29-30 Gode i unalino omyenase be.

1:26-2:25 Gode nakamine klaaebio be.

1:26-2:25 Gode baane a Nakai nib ulab klaanom o, ge baane a Gode naka esa unang osa e ulab klaanebio be.

## SABTA 2

Gode dabaale halone a nakae klaane ole yole nakamine mitdefen teme fugese a hek hek ganse a deibane a Gode baane a Nakamine ninino Adamo bo, ge ngenabase be. Gode damibo beselib dolmane a Gode Adame debetne a mone a damib ye dofase a kimaase be. Aaye sume damib tlaa tle bue damibo ninino Ideno be. Damib ibisak ye ase malaebio ta be. Nakamine asiyame dalo dowone a e amit afen smik sa biaamabe bo. Ase make ye bie ta nakae yame dalo dowone ta mistam baka ayam baka tekein kenamabe bo. Gode Adame baabane a

Damibo klaa kimaanal e! Asiyam afeto unalamabeb otane damib ele ase elekiem yeta mo walo downaeb e ele misiam baka ayam baka tekein kemin aso bo. Downaeb o kaanamabeo bo, ge baabase be. Eil a inab a kobol a wan a tim a til a aning a Gode i alukum dleb tene a Adame dlanse a Adame ninino nganie monse be. Gode baane a Adame elekiem bie yole misiamo bo. Alelo klaaubanasi a o Adame dahamabo bo, ge baane a omito Gode Adame aanonamino omale ta klaa aaunebio ta be. Omito Adame melebole talone a unangmono klaaubane ole eka e melene imin klaaobase a Adame haanane a Gode unangmono ometne a Adame tena tesio be. Adame unango wateme ole e baane a Obo ne ulab biebo bo. Gode obo ne melebole klaane mole obo unango bo, ge baabose be. Nakamine kukubo e awok osa aleb esa deibene a alelo omone a i kamo makob nio be. Gode baane a Ibo memei delanemib o. Inamin inamino alukum kimaan e! ge baabese be. Youmo blim keim blib otane i aal ginino besa blib ta be. Gode wateme ta inamin inamino klaa tlane o ayamano a watemse be. Amo siks (6) blimano ta Gode okoko blimano a amo seben (7) ole sinase be. Gode amo be.

### SABTA 3

3:1-24 Nakai a unang a i hengaibbio be.

1-7 Inabe dim omino be. Inabe unangmono baabone o Gode asiyamo alukumo awemo bo, ge baane buo gese a o baano a Alukum

asiyamo unino bo, genebio otane ase damib ibisak eleta awemo bo, genebio bo. Melebanemib o kaanomabio bo, genebio bo, geso a inabe baane a Mo kaanemibba bo. Walo downaib o misiam baka ayam baka tekein kenib a Gode ulabanomabio bo. God esa tekein kebe bo, ge baabose a o asiyame atemo ta bobole wabose a walo dowono a imake atosine dabanso a dowone a misiam baka ayam baka tekein kenib a temib ta aal keim ye blib kesoa asaano helo tebel bunib ta

8-21 tekeib afok tubuno ta Gode damib tlaa bebe ta Adam kam wali wentenib ta wata sesa wat ayok toulablib ta Gode nglabene a Fab blib e? ge nglabese a nakae ngenane o Ne kobo wenteni a aal keim kesoa tosianani a ayok toubli bo, ge nglabase a Gode baane o Wane ta baase ta asiyam aweme walo doweib e? ge baase a Adame baane o Kebmaye unang olo omnebbio ta omaye asiyame dobno ta dowoio bo, ge baabase a unango baabano a Inab eta dim baatnese ta asiyame dalo dowoio bo, ge baabaso a Gode inabe baabane a Kobo inabeb mole daak dabaal dim daak nal e! Keb molob sel isa o molob sel isa amit ye awa genantesin e! Kobo o molob seli kabmukono gowaubanabeb a e keb gabaamone kluta kenanamabe bo, ge baabase a Gode unango baabone a Obo memei dolanang gaeb o enin kino watememabeb otane obo imake gobaneb a eka e obo klaa kimaanamabe bo, ge baabose a Gode Adame baabane a Kobo inabeb mole sesa omfubkeio bo. Kebmaye bumolok biaaneb ta imen dango donama ulelo unalale kobo afen biaeb o inabiaaneb ta klaamal e! Ne dabaale

halo klaaio bo. Kobo imin deskina dabaalanamabeo bo, ge baabase a Gode eil aale golone ta isoumo klaane ta Adam kam wali kibenebio be. Adame unang olo ninino If ge ngena bue buo o ninino mit makamo afenin kesoa nakai a unang a i nib afoko be.

22-24 Adam kam wali i kukubo misiam baka ayam baka wafubisio be. Gode baane a I afen smik asiyame walo downaib ole amit afenomabio be. Misiamo bo, gene kesoa damibo fotebese a watnib a sesa wat onsio be. Gode abi seli baka ayal sekue baka delane a tenib a afen smik as deib unemin ye gebisio be. Adam kam wali damib ayamo deibonib a monib a dang mikik unabunib a dikilaasio be.

## Genesis Abridgement

Published 1974

Printed by the S.I.L. Printing Department  
Ukarumpa, E.H.D., Papua New Guinea

National Library of Australia  
Card Number and ISBN 0 86893 019 9